



# Өнегелі отбасылар өрелі әңгіме өрбітті

## Оразай ЖЕҢІСҰЛЫ

Өскемендегі облыстық балалар және жасөспірімдер кітапханасында «Өмір. Өнеге. Өсиет» атты отбасылық подиум өтті. Шараға қатысқан үлгілі екі шаңырақтың иелері көрермен жастарға ақыл-кеңестерін айтып, тәжірибелерімен бөлісті.

Кездесу кешінің кейіпкері – Абзалхановтар мен Мамышевтар отбасы. Әуелі екі шаңырақтың отағалары көрермен қауымға отбасы мүшелерін таныстырып, өз кәсіптері жайында әңгіме өрбітті.

Ерболат Абзалханов – өнер адамы. Ән айтып, әртүрлі мерекелік кештердің көркі болып жүр. Оған қоса отағасының шыны сынықтарының үстінде билейтін өнері де бар көрінеді. Сонысымен бұл күнде той-томалақтарда көпшіліктің көңілінен шығып жүрген жайы бар. Төрт бірдей сырғалының әкесі қыздарын ән айтып, би билеуге баулуда. Аталған кешке ертіп келген қос бүлдіршіні ән шырқап, отбасы мерейін және бір тасытты.

– Отбасы деген – шағын мемлекет. Оның береке мен бірлікте өмір сүруі ата-анаға тікелей бай-

ланысты. Менің бақытым да, байлығым да – жарым мен төрт қызым, – дейді Ерболат.

Мамышевтар әулетінің тірегі – Ринат. Ерболат Абзалханов өнер кенішінде жүрсе, Ринат көмір кенішінде еңбектенеді. Белсенді жұмысы үшін талай мәрте марапатталыпты. Екі атқамінер мен бір кестетігерді тәрбиелеп отыр.

– Отан – отбасынан басталады. Біздің кішкентай жанұямыздың босағасының беріктігі, еліміздің үлкен шаңырағының биіктігі деп білемін. Ұл-қыздарымызды өнегелі, ел мақтанышы болар азамат етіп тәрбиелеуге жолдасым екеуіміз барымызды салып келеміз, – дейді Ринат.

Кешке жиналған Өскемен политехникалық колледжінің шәкірттері өнегелі отбасылардың әңгімесін тыңдап, ой түйгендерін жеткізді.

– Біз үйде үш ұлмыз. Мен –



ортаншымын. Ата-анамыздың бізді де мақтан тұтып, үлкен үміт күтетінін түсіндім. Мен де отбасыммен мақтана аламын, – дейді аталмыш оқу орнының бірінші курс студенті Асқаржан Төлеуғазинов.

Қос отбасы кеш соңында

«Үшеуіміздің суретіміз» атты тренинг ойынға қатысты. Баласы салып бастаған суретті әкесі жалғастырып, анасы аяқтайды. Мамышевтар мен Абзалхановтар бұл сыннан сүрінбеді. Отбасылардың өзара түсіністігі осыдан көрінгендей болды.